

Professiuns

«Marellas» dal Radio Rumantsch sin disc cumpact, part 1

■ **L'emissiun «Marella» dal Radio Rumantsch è sa sviluppada il 1998 or da l'emissiun precedenta «Scuntrada». Sin la pagina d'internet da RTR preschentan las redacturas ed ils redactors da la Marella lur lavur sco suonda: «Nus dain in cuc davos las culissas, explitgain e mettain en in context – sajan quai fenomens novs u istorgias pauc enconuschentas.»** Fin l'onn 2000 èn las singulas emissiuns vegnidas arcuradas en la Biblioteca chantunala sin cassetta, ils onns 2001–2015 sin disc cumpact ed a partir dal 2016 be pli en furma digitala (banca da datas «Faro», accessibla al lieu). Bain sa laschan las emissiuns pli novas er tadlar sur rtr.ch, ma tar contribuziuns pli veglias è quai be il cas parzialmain, uschia che gist ils discs cumpacts en la Biblioteca chantunala furman qua in impurtanta cumplettaziun. Chatta.ch preschenta, en urden tematic, ils cuntengs da las emissiuns respectivas dals onns 2001–2015.

In di cun Rita Zanetti, postina a San Murezzan

Ella è flexibla e speditiva. Ed ella, ch'ha 30 onns, n'ha betg tema da la lavur. Cun 17 onns ha ella cumenzà l'emprendissadi da postina, perquai ch'i plascha ad ella da lavurar or en il liber. Ma avant che distribuir la posta èsi da la



zavrar e quai sto ir svelto. La Marella ha accumpagnà Rita Zanetti, ch'è creschida si a Samedan, durant in di da lavur. Quel cumenza marvegl ed ha in lung avantmezdi. (Emissiun dal prim da fanadur 2007; redacziun: Maria Cadruvi).

«Culs impissamaints sül binari» – in di cun Giosuel Puorger, guardialingia da Zernez

Sco montader da binaris e guardialingia da la Viafier retica controlla Giosuel Puorger ina giada l'emna ils binaris, ils set viaducts ed ils quatter tunnels tranter Cinuos-chel e Zernez. Tge èn precis sias incumbensas, co è quai en in tunnel cur ch'il tren arriva e tge chatt'ins tut sin e dasper ils binaris. Il Radio Rumantsch ha accumpagnà Giosuel Puorger sin sia tura da var 10 kilometers, in viadi a pe sur punts, tras tunnels ed il guaud da Carolina. (Emissiun dals 8 da fanadur 2007; redacziun: Guadench Dazzi).

In di cun il guardian dal parc Not Armon Willy

Not Armon Willy lavura dapi 12 onns tar il Parc Naziunal. El lavura dadora, el è en contact cun la natira, cun ils giasts, el enconuscha mintga chantun dal Parc Naziunal. El pussibilitescha als turists

in'egliada tras il spievel lung e fa attent sin ils miraculs da la natira. Il guardian dal parc fabritga sendas e punts ed ozendi è er il computer in impurtant med da lavur per el. La Marella accumpogna Not Armon Willy sin ina tura da surveglianza sin il Pass dal Fuorn. (Emissiun dals 15 da fanadur 2007; redacziun: Sara Hauschild).

In di cun la pura e pastura Carelia Joos

Carelia Joos (23) ha fatg la scola da purAs e durant la stad va ella ad alp. Questa stad è ella cun ses ami sin l'alp da la Creusch sur Alvagni. Els mulschan vartgas da latg e pertgiran muvel sitg. Savens lavura Carelia Joos 12 enfin 15 uras a di, e mintgatant na sa ella betg pertge ch'ella fa insumma questa lavur. Però mintga primavaira suonda ella danovamain il clom da l'alp. La Marella accumpogna ella durant in di da sia lavur. (Emissiun dals 22 da fanadur 2007; redacziun: Sara Hauschild).

In di cun Flurin Caduff, chantadur

Dis intensivs ha Flurin Caduff da Danis per il mument – u meglier ditg sairas intensivas. Il chantadur da 28 onns ch'è creschì si cun chant e musica ha in'impurtanta rolla en l'opera Moses che vegn dada questa stad a Cuort Sursaissa. El è il farao, il retg d'Egipta, l'inimi da Moses. Ed el gauda dad esser il nausch. Maria Cadruvi al ha accumpagnà l'emprim di ch'ìls acturs da l'opera han fatg emprovas en costums. (Emissiun dals 29 da fanadur 2007; redacziun: Maria Cadruvi).

Pazients sin quatter chommas – in di cun la veterinaria Jeannette Cantieni

Ils custs da sanadad per in giat svizzer importan en media 500 francs ad onn, quels per in chaun 740 francs. La medischina veterinara porscha oz bunamain las medemas pussaivladads sco la medischina umana: acupuntura, chemoterapias u giugadiras artificialas. Jeannette Cantieni da Sagogn tgira dapi var 30 onns pazients sin quatter chommas. La Marella è stada en consultaziun cun chauns, giats e cunigl. En sia pratica d'animals pitschens a Glion avain nus discurrì cun la veterinaria Jeannette Cantieni da sia lavur, da las pussaivladads e dals cunfins etics e medicinal. (Emissiun dals 5 d'avust 2007; redacziun: Guadench Dazzi).

In di cun Clemens Pfister, survegliader d'ina serenera

Sia lavur en la serenera è per Clemens Pfister sco in hobi, la serenera Zavragia a Zignau (Trun) sco in segund da chasa. Clemens Pfister gauda da lavurar persul, malgrà ch'el ha gugent cumpagnia. Magari sto el tadlar remartgas pervi da sia lavur, ma quai na disturba betg el. La Marella ha accumpagnà Clemens Pfister



Construcziun da vias.

FOTO: PD

durant in di da lavur. (Emissiun dals 12 d'avust 2007; redacziun: Valentin Schmed).

In di cun Christian Jacomet, policist

Sis dis lavurar e trais dis liber. Quai è il ritmus da Christian Jacomet da Mustér che lavura dapi 17 onns sco policist a la piazza aviatica a Kloten. El è sergent cun incaricas spezialas. Questas cumpiglian cunzunt servetschs da translaziun. Ed en ses servetsch ordinari ha el da patrugliar sin l'areal da l'eroport e da far controllas da passaports. Propi en ses element è el cur ch'el beneventa ils passagiers a l'arrivada e po discurrer las set linguas ch'el sa. (Emissiun dals 19 d'avust 2007; redacziun: Maria Cadruvi).

In di cun Maria Victoria Haas, chantadura

«Nus vegnin a far questa passascha antschient giadas», di en tun bainvulent il dirigent che sesa al clavazin. Enturn el èn trais chantaduras, tranter ellas Maria Victoria Haas da Domat. Ella è la Dorabella en l'opera «Così fan tutte» da Mozart. Quest'ovra vegn dada dal «Schweizer Opernstudio Biel» che collavura cun la «Hochschule der Künste» da Berna. Maria Victoria Haas finescha là ils proxims mais ses studi da chant. Ella fa il diplom da concert cun l'accent particular sin operas. La Marella ha accumpagnà la mezzosopranista da 28 onns durant in di cun emprovas ed ha constatà: dira lavur! (Emissiun dals 6 da fanadur 2008; redacziun: Maria Cadruvi).

In di cun Simon Derungs, anteriur manader da produczion d'ina lavandaria

Simon Derungs s'occupa dapi 20 onns da la laschiva tschuffa d'autras persunas. L'anteriur mecanist da maschinas da lavar era fin dacurt manader da produczion da la «Wäscheria» a Glion. Oz lavura el parzialmain per pensums e projects spezial ed è per uschè dir il joker da questa fatschenta. Er l'anteriur schef stat adina puspè gugent a la macchina da lavar, in monster da 9 meters lunghezza cun 11 caums e che lava var 400 kg biancaria en ina. La Marella ha accumpagnà Simon Derungs tras la lavandaria ed ha discurrì cun el davart l'art da lavar. (Emissiun dals 20 da fanadur 2008; redacziun: Guadench Dazzi).

In di cun Giusep Beeli, greenkeeper sin la piazza da golf Sagogn-Schluein

Blers onns ha el fatg fain per sias vartgas sin ils prads da Sagogn. Avant in onn ha Giusep Beeli dentant midà professiun. El lavura anc adina sin ils prads da Sagogn – oz dentant sco greenkeeper sin la nova piazza da golf. Malgrà ch'el n'ha betg pli las libertads sco pli baud, è el mai s'enriclà d'avair fatg la midada dal pur al greenkeeper. En la Marella quinta Giusep Beeli da sia nova profes-

siun. (Emissiun dals 3 d'avust 2008; redacziun: Valentin Schmed).

In di cun Aldo Pitsch, directur da l'EAM

EAM stat per «Evangelische Alterssiedlung Masans». Ed atgnamain sa numna il directur Aldo Pitsch «Heimleiter». Ma en vardad è el in manager. El è responsabel per la gestiun operativa dal pli grond abitadi per vegls en il Grischun. L'EAM a Cuir ha 180 letgs e quasi 200 collavurants e vul porscher a ses avdants ina saira da la vita empernaivla e degna. Aldo Pitsch sa che naging vegn tar els da libra veglia. Tant pli gronda è la sfida da porscher il meglier puncto ospitalità e tgira. En il mintgadi dal directur vul quai dir: bleras sesidas, blers inscuters – ed uss sa legrar sin la chatscha. (Emissiun dals 24 d'avust 2008; redacziun: Maria Cadruvi).

Construir la via – privlus e fascinant. In di sin il plazzal tranter Garsun e Lavin

Tgi che va cun auto sa che la stad èsi da far quint cun impediments sin via – ils plazzals da fabrica. Dentant: tge recepimus da quests plazzals? Normalmain be il temp ch'ins sto spetgar. Ma quai ch'ìls lavurants prestan na vesain nus betg. Di per di en la pulvra. Di per di far atenziun dal traffic che passa. Ma di per di er vesair in resultat: la fin finala ina via sco nova per il traffic. La Marella è stada in di sin il plazzal da fabrica sin via tranter Garsun e Lavin en l'Engiadina Bassa. Dapi quatter onns vegn quest trajet da via renovà e schlargià. L'emissiun mussa impressiuns da las persunas che lavuran di per di sin quest plazzal. (Emissiun dal prim da fanadur 2012; redacziun: David Spinnler).

Ils oranschs – a la lavur cun ils viers

Ina dunna dumonda in vier che fa pausa pertge ch'el mangia in mail che saja marsch? Cur ch'el haja cumenzà a mangiar il mail era quel anc frestg, respunda il vier. Da questas e sumegliantas sgnoccas da viers datti bleras. Di per di entupain nus ils viers per lung da las vias dentant senza savair tge pensum ch'els han propi. La Marella ha accumpagnà ils viers dal district Surselva ch'èn staziunads a Mustér. (Emissiun dals 20 d'avrigl 2008; redacziun: Valentin Schmed).

In mintgadi tranter morts – la Marella en l'institut da sepultura

Sefi Decurtins gudogna ses paun da mintgadi cun ils morts. El fa 450 fin 500 sepulturas l'onn. El ornescha vaschels, el lava ils morts, el chava fossas. Tar accidents e suicidis repara el las blessuras e rattadiras da las baras. Cur che auters èn trists e desperads, sa el tge ch'igl è da far. El organisescha funerals, cremaziuns, cartas da condolientscha, cranzs da flurs. Il mastergn extraordinari ha l'um da 54 onns tscherni suenter in destin persunal. (Emissiun dals 27 da fanadur

2008; redacziun: Sara Hauschild).

L'um cun il cilinder – il spazzachamin

100 onns giubileum festivescha quest onn l'Uniun da maister-spazzachamins dal Grischun. La Marella ha accumpagnà in giuven spazzachamin a la lavur da mintgadi. In spazzachamin pli vegl quinta episodas da pli baud, per exempel co ch'el è sglà ina giada cun in eroplan sin in glatscher per ir a far giu fulin. Ha quai propi prendì ina buna fin? (Emissiun dals 10 da mars 2002; redacziun: Flavio Huonder).

Esser pur – mintgin sin sia moda

En la politica agrara hai dà ils ultims 15 onns grondas midadas. Quellas han er dà la pussaivladad als purs da far midadas. Anton à Porta da Scuol fa il pur ed è producent da latg, per el na datti nagut auter. Martin Capaul da Lumbrein, el ha fatg la midada dal producent da latg sin vatgas-mamma. Ronald Cahenzli da Siat metta sper ses puresser cun animals da Pro Specie Rara sin la carta agroturissem. Els trais èn purs – mintgin sin sia moda. (Emissiun dals 14 da mars 2010; redacziun: Esther Berther).

La Viafier retica – il bun patron?!

Dapi 100 onns cursescha il tren da la Viafier retica er sin la lingia tranter Bever e Scuol en l'Engiadina Bassa. La Viafier retica è perquai in impurtant patron per la regiun. Ma tge patron è la Viafier retica? La Marella dal Radio Rumantsch discorra cun glieud ch'ha lavurà pli baud tar la Reticca e cun da quella che lavura uss tar la Reticca. (Emissiun dals 23 da zercladur 2013; redacziun: David Spinnler).

Mes guaffen


Tge han Rafael Bisquolm, Josef Lombris, Roman Plaz e Carlo Caduff cuminaivel? Els tuts han professiuns differentas, però in guaffen specific ch'els dovan en lur lavur dal mintga di. Tuttina sch'ins fora tatoos, sch'ins martellescha fier u sch'ins fa schlondas: ins dova in guaffen. Guaffens, apparats, instruments, isegls – bels peds per utensils utils. La Marella dat in sguard en ils ateliers, en las professiuns dals umens menziunads e descriva lur lavur e lur guaffens preferids. (Emissiun dals 25 da november 2012; redacziun: Andrin Willi).

La preschentaaziun:

«Marellas» dal Radio Rumantsch: Contribuziuns emessas ils onns 2001–2015, accessiblas en la Biblioteca chantunala sin disc cumpact.

Dapli infurmaziuns:

chatta.ch/?hiid=4734
www.chatta.ch



La veterinaria vi da la lavur.

FOTO: PD